

ABAVE' INUBA

1 :1-31 Yaubada Gaito'o Moya'aidi Gibubudi

1:1-5 1 Inuba-mo'ena Yaubada lobama be babi-mo'a gimidibubudi. 2 Babi-mo'a yama-yamana kakawana gimiyami, ada uyu'uyuyuna ni'u getane gimiyami, ada Yaubada Alu'alu-wana ni'u getane gi'alu'alugedadanena.

3 Ada Yaubada gigahe gigayo, "Mahamahalina gidayemu", be mahamahalina giyemu.

4 Kadu Yaubada mahamahalina gi'itana higa yamumuna, ada Yaubada mahamahalina be uyu'uyuyuna gilivihidi. 5 Ada Yaubada mahamahalina givewagana Uyadayada, kadu uyuyu givewagana Bogibogi. Ada ahe lavilavi ada ahe malalauga, tova sa'eyana.

1:6-8 6 Tu Yaubada gigahe gigayo, "Aba'ailivita gidayemu ni'u hinafane ada ni'u be ni'u gidalivihidi." 7 Ada Yaubada aba'ailivita gibubuna ada ni'u aba'ailivita dibune be ni'u aba'ailivita getane

gilivihidi. Ada ahe amine. 8 Ada Yaubada aba'ailivitai-nadi givewagana Lobama. Kadu ahe lavilavi ada ahe malalauga, tova anavelu.

1:9-13 9 Tu Yaubada gigahe gigayo, "Ni'u lobama dibune hidavaga'auta hidavesa'eya kadu avala gidalakayemu." Ada ahe amine. 10 Ada Yaubada avala givewagana Babi ada ni'u yadi vaga'auta givewagana Lehaga. Kadu Yaubada gi'itana higa yamumuna. 11 Ada Yaubada gigahe gigayo, "Babiya isisi'u hidakabu, a'a wa'otovidi, balele wa'otovidi, ai veguveguwadi wa'otovidi babi againe hidaveguwa, guwadi tulidi tulidi. Ada ahe amine. 12 Ada babiya isisi'u hikabu, a'a wa'otovidi, balele wa'otovidi, ada ai veguveguwadi wa'otovidi hiveguwa, guwadi tulidi tulidi. Kadu Yaubada gi'itana higa yamumuna. 13 Kadu ahe lavilavi ada ahe malalauga, tova anaveto.

1:14-19 14 Tu Yaubada gigahe gigayo, "Mahala hidalakayemu lobama lulauvana

againe, uyadayada be uyuyu hidalivihidi fa'ina. Mahala tova hidave'iya'iyayedi, wehi ana tova, kakaha ana tova, kadu aiyeta be malamala hidave'iya'iyayedi. Mahala aituga fa'idiya. 15 Ada mahala lobama lulauvana againe babi-mo'a hidatuvemahalina." Kadu ahe amine. 16 Ada Yaubada mahala lakahidi luhei gibubudi ada mahala lakahina uyadayada gidavehimeyena, mahala kabi'ona uyuyu gidavehimeyena, kadu badibadi gibubudi. 17 Ada Yaubada lobama lulauvana againe gisedi babi-mo'a hidatuvemahalina fa'ina, 18 Ada uyadayada be uyuyuya hidavehimeyedi fa'ina, kadu maha-mahalina be uyu'uyuyuna hidalivihidi fa'ina. Ada Yaubada gi'itana higa yamumuna. 19 Kadu ahe lavilavi ada ahe malalauga, tova anave 4.

1:20-23 20 Tu Yaubada gigahe gigayo, "Ni'u gaito'o i'ibubunidi wayawaidiyao hida'ivetubulalagidi, kadu manuga hidayave-yavega babi getane lobama hinafane." 21 Ada abi'eya lakahidi kadu gaito'o

i'ibubunidi wayawaidiyao moy'a'idi hinunu-'igaigana-ma Yaubada gibubudi, badi ni'u agaidiya hiyo'oyo'o, waumidi tulina tulina. Kadu manuga wa'ofadiyao, bebewa wa'ofadiyao gibubudi, waumidi tulina tulina. Ada Yaubada gi'itana higa yamumuna. 22 Ada Yaubada nuwanuwa yamumuna badi fa'idiya gigaheyena gigayo, "Wadabihiwami wadave-'aliyahega ada ni'u lehageya wadavemagana, ada manuga babiya hidabihiwadi. 23 Kadu ahe lavilavi ada ahe malalauga, tova anave 5.

1:24-27 24 Tu Yaubada gigahe gigayo, "Babi gaito'o i'ibubunidi wayawaidiyao moy'a'idi gida'ivetubulalagidi, waumidi tulina tulina. Kadu yomuyomu, i'ibubunidi gayagayagidi, kevakeva walawala'a gida'ive-tubulalagidi waumidi tulina tulina. Ada ahe amine. 25 Ada Yaubada kevakeva walawala'a gibubudi, waumidi tulina tulina, kadu i'ibubunidi moy'a'idi babiya hi'i'igayagayaga-ma gibubudi, waumidi tulina tulina. Ada Yaubada gi'itana higa

yamumuna. 26 Au Yaubada gigahe gigayo, "Kaliva kadabubuna anunuda amine, kadu ada ita'ita amine. Ada hidavehimeya lehaga iganina agaidiya, hahavi manugina agaidiya, yomuyomu agaidiya, babi moy'a'aina againe, kadu i'ibubunidi gayagaya-gidi moy'a'idi agaidiya. 27 Anafaiweya Yaubada kaliva gibubuna tauna anununa amine. E, Yaubada anununa amine gibubuna, kaliva be kwamayoku gibubudi.

1:28-31 28 Ada Yaubada yana nuwanuwa yamumuna badi fa'idiya gigaheyena gigayo, "Wanavefoulufuwaga be wanavenatunalilihiwaga, ada babi-mo'a wanavemagana, ada wanafaiwala be wanavehavaina. Ada lehaga iganina agaidiya, hahavi manugina agaidiya, kadu gaito'o moy'a'idi wayawaiyao babiya hinauna-ma agaidiya wanavehimeya. 29 Kadu Yaubada gigahe gigayo, "Wa'ita, aihaya moy'a'aina wa'otovina babi moy'a'aina matane himimiyami-ma a gavele'owomi, kadu ai moy'a'aina waguwana wa'otovina amiga fa'ina me'ama. 30 Ada kevakeva walawala'a moy-

'aidi agaidiya, hahavi manugina moy'a'idi agaidiya, i'ibubunidi moy'a'idi babiya hi'i'igayagayaga-ma agaidiya, kadu gaito'o moy'a'idi wayawaiyao agaidiya, yogo matamatagina moy'a'aina ahe gaveledi adiga fa'ina." Ada ahe amine. 31 Tu Yaubada gaitoma sa'eyana sa'eyana ahe gibubudi-ma gi'itadi higa yamuyamumu-mo'edi. Kadu ahe lavilavi ada ahe malalauga tovai-nadi anave 6.

2:1-4 Tova Anave 7 Fa'ina

2:1-4 1 Anafaiweya lobama be babi-mo'a gibubu-owona adi yo'o moy'a'aina. 2 Tu tova anave 7 Yaubada yana aibubuna gilauyabu, ada tova anave 7 againe yana faisewa moy'a'aina gi'ilovenia. 3 Au Yaubada tova anave 7 fa'ina nuwanuwa yamumuna gigaheyena be gisevehailena, ada miyabogi gilubodana, Yaubada yana faisewa moy'a'aina gibubuna-ma againe gi'ilova fa'ina. 4 Lobama be babi-mo'a kahihidi adi aibubuna againe au hidede amine.

2:5-25 Kaliva Ana Aibubuna

2:5-10 5 Tova Yaubada babi-mo'a be lobama gibubudi medede againe aimo keke tamo isisi'u babiya gidadauda, kadu keke tamo a'a gidakabukabu. Yaubada babiya wehi keke gidakiveheloloni fa'ina, kadu kaliva keke tamo gidamiyami-yo babi gidafahafahani.
 6 Tu gufa babi againe giguwaguwalena be babi matana moy'a'ina gikikiveduvedubana.
 7 Au Yaubada babi maikamaikawana againe kaliva giki'amo'amovekalivana be kabu'awane yawaina giya'avedamana, ada ahe givekaliva, bana'e gaito'o i'ibubunina wayawaina.
 8 Ada Yaubada faha gifahana lauhanaga amine babi ana egana Ideni againe, ada giki'amo'amonan kalivai-nadi-ma wadedei againe gisena. 9 Ada Yaubada ai moy'a'ina adi ita'ita nuwavaivaidiyao, be guwadi a'a yamumuna babi againe gikive'awagagalidi; kadu'e yawaida ana ai kaliva hina'ana-ma keke hina'alika, au hinamiya-vagata. Medema faha hinafane, kadu ai velugana nuwanuwa yamumuna be koyona adi abahalamana ana

ai. 10 Gufa gihobu Ideni againe be faha gi'ivenuvenumulina, tu gihobu be agena 4 gisedi.

2:15-17 15 Tu Yaubada kaliva givega'aulena tu faha Ideni againe gisena be gidafaha tu gida'itave'avina. 16 Ada Yaubada kaliva givehimeyena gigayo, "Faha aina moy'a'ina againe una'a-kawokawowo, 17 Tu nuwanuwa yamumuna be koyona adi abahalamana ana ai againe keke una'a, fa'ina aiyetai-nadi againe una'ana wona velemo'ena una'alika."

2:18-20 18 Kadu Yaubada gigahe gigayo, "Kaliva anakaibe gimimiyami ana ita keke yamumuna. Au ana toveluga ana aluna bana amine ganabubuna." 19 Ada auwe, babi againe Yaubada kevakeva walawala'a moy-a'idi, kadu hahavi manugina moy'a'idi giki'amo'amodi, ada kaliva againe gi'aliyedi be gida'ita, kai kaliva gavaimi gidavewagadi, tu gavana kaliva gaito'o i'ibubunidi wayawai'diyao sa'eyana sa'eyana givewagadi, badi adi egana. 20 E, yomuyomu moy'a'idi, hahavi manugina, kadu kevakeva

walawala'a moy'a'idi adi egana tulina
 tulina kaliva givewagadi be giyakahidi,
 tu kaliva fa'ine keke tamo ana toveluga
 bana anafaiweya.

2:21-25 21 Hidema fa'ina Yaubada kaliva
 give'enomataigina, ada gi'enomataiga againe
 bana lumalumana sa'eyana givaina be vidona
 againe gisebodana. 22 Ada lumalumai-nadi
 Yaubada kaliva againe givaina-ma againe
 kwamayoku gibubuvekwamayokuna, ada ahe
 givekwamayoku, ada kaliva againe givega-
 'aulena. 23 Givega'aulena, au kaliva
 gigahe gigayo, "Auwe hideva luluna luluku
 kadu wowona wowoku, au wowoma sa'eyana.
 Bana ana egana kwamayoku, kaliva againe
 Yaubada gikiveyemaunina fa'ina. 24 Hidema
 fa'ina nagi againe kwamayoku tamana be
 hinana gihegedi, tu moganena againe
 gimiyave'avina, ada adiseluga wowodi
 sa'eyana. 25 Ada kaliva be vavinena
 adiseluga hivekonekone tu keke hidawowomumu.

3:1-24 Kaliva Yana Be'u

3:1-7 1 Tu oloto aikaunuwanuwa-mo'ena
 tu kevakeva walawala'a moy'a'idi Yaubada
 gibubudi-ma, badi ma'ita. Tu kwamayoku
 againe gigahe gigayo, "Ka'i velemo'ena
 Yaubada ahe gigahe keke tamo faha aina
 agaidiya wana'au'a?" 2 Ada kwamayoku
 oloto againe gigahe gigayo, "Faha aina
 guwadiya amafaiweya ana'a, 3 Tu ai faha
 hinafane medema guwana fa'ine Yaubada ahe
 gigahe gigayo, 'Keke againe wana'a kadu
 keke wanakiluvaluvani.' Ka'i anakiluvaluvana
 digo, au ana'alika." 4 Tu oloto kwamayoku
 againe gigahe gigayo, "Keke mo'a
 wana'alika, 5 Tu wana'ana againe au
 matami ginamahalina, ada Yaubada amine
 amiseluga wanaveyaubada, nuwanuwa yamumuna
 be koyona wanahalamani, Yaubada yana
 nuwahuya amine omi'iyao. Au higa Yaubada
 gihalahalamana be keke gidahawavemogataleni
 agaimiya." 6 Tu kwamayoku gina be gi'ita
 higa ai-nadi guwana a'a yamumuna kadu
 ana ita'ita nuwavaivaina, kadu nuwahuya

fa'ine higa nuwavaivaina. Gi'itana be
guwana gikoluna ada gi'ana. Kadu'e ma'ita
moganena givelena be gi'ana. 7 Hi'ana tu
adiseluga matadi gimahalina be halamana
hivaina. Ada higahe higayo, "Konekonemeyao
amimiyami." Au ai lukumina hidakana be
hi'onana adi aikeva fa'ine.

3:8-13 8 Tu mala gilavina againe
Yaubada faheya ginunudadana be butuna
hinogalina. Hinogalina tu kaliva wavavinena
hiveudimodimo faha ana ai agaidiya,
Yaubada keke gina'itadi fa'ina. 9 Ada
Yaubada kaliva gikovana gigayo, "Hai
umimiyami?" 10 Ada gigayo, "We'a tu o
butu faheya ganogalina au gawowomumu
konekoneku fa'ina ada againe gaveu."
11 Ada Yaubada gigayo, "Hakwadi gihawave-
mogatale higa uvekonekone? Ai-nadi
gahawatana-ma againe ka'i ahe u'ana?"
12 Ada kaliva gigahe gigayo, "Kwamayoku-
nadi aku aluna fa'ine uveleku, bana
ai-nadi againe giveleku be ga'ana."
13 Atu kwamayoku againe Yaubada gigahe

gigayo, "Gavaimi uga?" Kwamayoku gigayo,
"Oloto gigahekauyeku be ga'ana."

3:14-19 14 Au Yaubada oloto againe
gigahe gigayo,
"Ukoyo'ima'ima fa'ina
A alatabutabu lakahi-mo'ena ganavele,
Kevakeva walawala'a adi alatabutabu ma'ita.
Kamoniya unanunu-vagata,
Fwayafwaya una'au'ana.

15 Yaku vehimeya againe
O'eni be kwamayoku wanave'avenivenibaina
Kadu a yo'o be badi'e adi yo'o
hinave'avenivenibaina.

Badi adi yo'o kalivana u'u
ginavagafuwafuwana,
Tu bana age'edu'eduna unayovana.

16 Ada kwamayoku againe gigahe gigayo,
"Ukoyo fa'ina ya aulolo be ya tagiya
Unavenatuna againe ganakivetubugi-mo'ena;
Aulolo againe natumomo unavenatunedi.
Tu aimo mogane againe nuwanuwa lakahina,
Ada againiya ginavehimeya."

17 Ada Adama againe gigahe gigayo,

"Vavine bonana unogalina fa'ina,
 Ada againe ai-nadi gahawatana-ma againe u'a,
 Au babi gikoyo o fa'iniya.
 Be againe watagigi una'au'a,
 Yawaini ana aituha moy'a'ine.

18 Aboda kadu yogo babi
 Ginave'awagagalina o fa'iniya;
 Ada faha a'ana againe una'a.

19 Magiginiya a hitana ginafolu againe
 Aga unavaina be una'ana.
 Ginanauwena alika againe, au bakiya unayewa,
 Fa'ina babi againe ulakayemu.
 Tu o'eni, babi maikamaikawana,
 Kadu alika againe unavebabi-havagi."

3:20-24 20 Tu kaliva vavinena givewagana
 Ive, bana'e tomiyababi moy'aideyao hinada
 fa'ina. 21 Tu Yaubada kevakeva gimunudi
 be kwafilidi againe Adama wavavinena adi
 aikeva give'osedi. 22 Au Yaubada gigahe
 gigayo, "Adamoya kalivai-nadi ahe ide'eyao
 amine, nuwanuwa yamumuna be koyona
 gihalamani, tu ka'i nimana gidatunena
 yawaidi ana ai againe kadu'e gidakoluna

be gida'ana, ada againe gidamiya-vagata.
 23 Hidema fa'ina Yaubada giluwavina be faha
 Ideni ginuyabuyabuna, be babi gilakayemu
 againe-ma gidafahana. 24 Au kaliva
 giluwavina ada lauhanaga amine Ideni faha
 againe lobama ana tovenuwa'ata ita'itave-
 'avidiyao gisedi, kadu noya'aina ana ita
 ilama amine gitalatalabababalina, yawaida
 aina ana eda gidasebodana fa'ina.

This translation has been prepared under the
 auspices of the Summer Institute of
 Linguistics.